

Jo-Kolosai

JANDIKO: Jaote Paulo

KAR NDIKO: RUMI

KINDE NDIKO: 60 kata 61 E YIK RUOTH (AD)

Gik Manie Iye

Paulo nondiko baruwani kaen e twech Rumi, nondike e dala mane pok olimo nyaka nene. Magi gin joma nowinjo wach kuomgi ni giyie kane en e dala mar Efeso e wuodhe mar tero Injili mar ariyo, to chunye nechandore bang' kane owinjo kit lamo moko magalagala mag jopiny mane donjo ei kanisa. Weche mane chando jo-Kolosai ne gin gik mopogore opogore machalo yedhe mag ajuoge mag pinyini, weche mag somo sulwe kod din jo-Yahudi mane koro miyo Kristo nenore matin mana kaka malaika. Paulo nondiko mondo okwed puonj marachni konyisogi ni Kristo en Nyasaye adiera kendo kido duto mag Nyasaye manyaka chieng' nitie kuome 2:9. Opuonjogi bende kaka ginyalo dak kaka jo-Kristo.

THORRO:

Baruwani ma Paulo ondiko gi chunye tee, onyisowa maber kuom kit Kristo kaka en Nyasaye kod duong'ne. En duto kuom duto kendo ja-Kristo yudo gimoro amora modwaro kuom Kristo. Paulo kwero jo-Kristo ni mondo kik wuondgi gi weche mofuwo kod rieko manono mag dhano (2:8). Ochiwo puonj kuom dak mar ja-Kristo manyiso teko Nyasaye ne dhano kod mor ma joma oyie nyalo bedogo ka gitiyo gi gik moko duto magin-go koa kuom Kristo.

WECHE MOCHAN KAE GIN:

1. Lemb Paulo mokwongo 1:1-14 2.
2. Duong' mar Kristo 1:15-2:3
3. Siem kuom yie mag miriambo 2:4-23
4. Puonj kuom dak ja-Kristo 3:1-4:1
5. Puonj kuom lamo gi weche mogik 4:2-18

1 An Paulo Jaote mar Kristo Yesu kuom dware mar Nyasaye kaachiel gi Timotheo owadwa, ²andikonu un owetewa man Kolosai, ma jomaler kendo majaadiera kuom Kristo.

Ng'wono gi kuwe moa kuom Nyasaye Wuonwa obed kodu.

Erokamano Kod Lamo

³Ka walemonu to waduoko erokamano pile ni Nyasaye ma en Wuon Ruodhwa Yesu Kristo, ⁴watimo kamano nikech wasewinjo yie ma un-go kuom Kristo Yesu,

kendo hera musenyiso jomaler duto. ⁵Yie kod hera moa kuom geno mokannu e polo, mane uwinjo kuom wach maradier, ma en Wach Maber, ⁶mane okelnu. E piny duto Injilini koro nyago olemo kendo landore, mana kaka osetimo e dieru nyaka chakre odiechieng' ma nuwinjoe ng'wono mar Nyasaye e adiera duto kendo ng'eyoe. ⁷Nupuonjoru wachni kuom Epafra ma en misumba Kristo wadwa mwageno, kendo ma jatich Kristo majaadiera matiyo karwa, ⁸ma bende nonyisowa kuom hera maru moa kuom Roho.

⁹Kuom mano, chakre odiechieng' mane wawinjo wachu pok waweyo mak walam-onu kendo kwayo Nyasaye mondo opong'u kod riekko mar ng'eyo dwarone, ka un-kod riekko mar chuny kod winjo ma Roho chiwo. ¹⁰Bende walamo kamano mondo udag ngima ma Ruoth morgo, kumiye mor e yore duto, ka unyago olemo mag timbe mabeyo kendo kuom medo ng'eyo Nyasaye, ¹¹ka imiyoo bedo motegno gi teko duto mar duong'ne mang'ongo, mondo eka ubed joma odhil matimo kinda e yore duto, kendo ¹²ma goyo erokamano ni Wuoro gi ilo. En ema oseketou e rang'iny mar yudo gwith mag jomaler e piny ler. ¹³Nikech oseresowa waa e loch mar mudho mi okelowa e loch mar Wuode mohero, ¹⁴ma kuome wanie gi resruok, noresowa mokelonwa warruok mar richo.

Kristo Duong' Moloyo Duto

¹⁵Kristo e kido mineno mar Nyasaye maok ne, kendo en e kayo ne chwech duto. ¹⁶Nikech kuome gik moko duto nochwe; gik manie polo gi piny; mineno kod maok ne; kata gibed duong' kata teko, kata ruodhi kata loch. En ema nochweyo gik moko duto, kendo gik moko duto nochwene. ¹⁷Ne entie kapok gimoro amora nobetie, kendo kuome ema gik moko duto oriwore. ¹⁸En e wi ringruok, ma en kanisa, kendo en e ma nokuongo chier oa kuom joma otho, mondo obed gi loch kuom gik moko duto. ¹⁹Nikech Nyasaye ne mor mondo duong'ne duto obed kuom Wuode, ²⁰kendo kuome Nyasaye nomiyo gik moko duto obedo gi winjruok kode, kata gibed gik manie piny kata manie polo, kokelo kuwe kuom remb Wuode manochwer e msalaba.

²¹Chon nupogoru gi Nyasaye, kendo ne un wasike e pachu nikech timbe maricho ma nutimo. ²²To koro osetimonu winjruok e kindu kode kuom tho Kristo e ringruok, mondo oteru e nyime kuler ka uonge gi mbala mar richo kendo ka uonge ketho. ²³Mano biro timore mana ka udhi nyime e yieu, kendo kuchung' motegno ma ok uyiengni uweyo geno mar Wach Maber.

Ma e Wach Maber ma nuwinjo, kendo ma koro oseyal ni chwech duto e bwo polo, kendo ma an Paulo awuon an jatichne.

Tij Paulo Ma Otiyo Ni Kanisa

²⁴Koro amor kuom masiche maseyudo nikech un, nikech apongo' e ringra gik morem kuom masiche mane Kristo oneno, nikech ringre, ma en kanisa. ²⁵Asedoko jatich kanisa kaluwore gi ote mane Nyasaye oorago iru mondo ayalnu wachege duto, ²⁶ma en wach maling'ling' manopandi kuom higini gi tienge mang'eny to koro oseel tiende ni jomaler. ²⁷Gin ema Nyasaye osejero mondo onyis ogendini mwandu gi duong' man kuom wach maling'ling' manopandino, en Kristo modak e chunyu kendo ma en e geno mar duong'

²⁸Kristono e mwalando ne ji duto ka wasiemo kendo wapuonjo ji gi riekko duto, mondo water ji duto e nyim Kristo ka ler chutho. ²⁹Mano emomiyo anyagora ka atiyoo matek, gi teko maduong' ma Kristo nomiya, matiyo matek e ngimana.

2 Adwaro mondo ung'e kaka akedonu matek, kendo ni joma ni Laodikia, kaachiel gi ji mamoko duto mapok onena gi wang'gi. ²Thorro mara en ni mondo gibed gi chuny motegno kendo giriwre e hera, eka ginibed gi mwandu mar ng'eyo tiend weche maradier. Ka gitimo kama to gin-ing'e maling'ling' mar Nyasaye ma en Kristo, ³jal ma mwandu duto mag riekko kod ng'eyo Nyasaye opand kuome. ⁴Anyisou ma mondo kik ng'ato owuondu gi weche manono milungo kendo maywayo ji. ⁵Nikech kata obedo ni aonge kodu kuom ringruok, to an kodu kuom chuny, kendo amor mar neno kaka uchanoru maber kendo kaka yieu ochung' motegno kuom Kristo.

Bedo Thuolo Kuom Chike Dhano Kaluore Gi Ngima Kuom Kristo

⁶Koro kaka nurwako Kristo Yesu ka Ruoth, dhiuru nyime ka udak kuome, ⁷ka ugururu motegno kendo ugeroru kuome, kumedo bedo motegno e yie kaka nupuon-

ju, kendo kupong' gi goyo erokamano.

⁸Kik uyie mondo ng'ato ang'ata omak pachu gi riekni manono mag piny gi wuond manono ma wito ji, ma gin riekno ma aa kuom puonj dhano gi timbe mag piny, to ok kuom Kristo.

⁹Nikech kit Nyasaye duto e ringruok odak ei Kristo, ¹⁰un to koro useyudo ngima moromo chutho kuom Kristo, ma e jatelo mar telo duto, kendo en teko moloyo teko gi loch duto. ¹¹Kuome ema noterue nyangu, ka igilo kit dhano machon maok nyangu motim lwet gi dhano, to nyangu motim gi Kristo. ¹²Kane obatisu, to noiku kode kendo nochieru kode nikech yie ma un-go kuom teko mar Nyasaye ma nochiere oa kuom joma otho.

¹³Kane utho e richou, kod kit ngimau mar richo maok nyangu, Nyasaye ne omiyo udoko mangima kuom Kristo. Noweyonwa richowa duto, ¹⁴korucho chike mane ondiki kod kuergi duto mane okwedowa kendo opogowa, kogologi oko duto mi ogurogi e Msalaba. ¹⁵Kendo kane osekecho teko gi lochgi momiyogi wichkuot e lela moriem-bogi koloyogi gi teko mar msalaba.

¹⁶Kuom mano, kik uwe ng'ato ong'adnu bura kuom gik muchamo kata mumadho, kata kuom weche mag sewni mag lemo, kata sewni mitimo ka dwe manyien owuok, kata chieng' Sabato. ¹⁷Magi duto gin mana tipo mag gik mane onego obi, to adiera wuon yudore kuom Kristo. ¹⁸Kik uwe ng'ato ang'ata mamor kuom dembruok mar miriambo kod malamo malaike omi ubed maonge pok. Ng'at makamano wacho mathoth konyiso ji kuom fweny moseneno, kendo pache mar dhano miyo oting'ore malo nono kowuoyo kuom gik mokiya tiendgi. ¹⁹Ng'atno oseweya tudruok gi wich ma en e kama ringruok duto otude kendo omoke ka omake gi fuonini kod leche kaachiel, kendo gidongo kaka Nyasaye dwaro ni gidongi.

²⁰Ka usetho gi Kristo mi ogonyou kuom timbe machon mag pinyini, to koro ere gima omiyo pod uwuotho ka jopiny? Ang'lo momiyo pod umako chikegegi ni, ²¹"Kik

imak gini," kata ni, "Kik ibil gini," kata ni, "Kik imul gini"? ²²Gi duto gin gik ma lal nono, nikech gin mana chike gi puonj mag dhano. ²³Ginyalo nenore gioko ni riekno nie igi ka gilemo gi lamo mar paro mar dhano, kendo kuom dembruok maoko, kod sando ringruok, to chutho gionge ohala nikech ok ginyal konyo ng'ato geng'o gombo mag ringruok.

Chike Mag Ngima Maler

3 Ka osechieru gi Kristo, keturu chunyu kuom gik manie polo, kuma Kristo obetie e bat korachwich mar Nyasaye. ²Keturu pachu kuom gik man malo to ok kuom gii piny. ³Nikech ne utho kendo ngimau koro opandi ei Kristo, kuom Nyasaye. ⁴Ka Kristo, ma en ngimau nofwenyre to un bende unubi kode e duong'ne maler.

⁵Emomiyo neguru dwaro duto mag ringruok ma nie ngimau, kaka: chode, dwanyruok, gombo, dwaro maricho, kod wuoro, ma en lamo nyiseche manono. ⁶Nikech gigi Nyasaye biro olo mirimbe kuom joma ok winj wachne. ⁷Un bende ne uwuotho e yoregi e ngimau machon mane udakie ⁸To koro nyaka ulony oko kit richo duto kaka: ich wang' mirima, himruok, ketho nying'ji, kod dwanyo wach ma wuok e dhau. ⁹Kik ng'ato kuomu wuond wadgi, nikech uselonoy kit dhano machon kod timbene duto, ¹⁰mi urwakoru gi dhano manyien mamedo bedo manyien pile mondo obed machal gi kit ja chuechne. ¹¹E ngima manyi-enni koro onge Ogendini kata ja-Yahudi, onge ng'ama oter nyangu kata ng'at maok oter nyangu, bende onge jamwa kata jamaranda, misumba kata ng'ama ni thuolo, to Kristo e moromo kendo en duto kuom duto.

¹²Kuom mano, kaka un jo Nyasaye moyiero, maler kendo mogeno, rwakreuru gi kech, gi miwafu, gi bolruok, gi muolo, kod kinda. ¹³Beduru joma oyie kawo nyawo mar jowadgi kendo ka weyo ni nyawadgi kethone. Weneuru ji richogi kaka Ruoth bende noweyonu richou. ¹⁴To moloyo ni mago duto, rwakreuru gi heru, mariwo wechegi duto mi giwinjre kaka

gimoro achiel.

¹⁵Weuru mondo kuwe mar Kristo obed jaloch e chunyu kaka fuondi mag ringruok achiel, noluongu e kuwe, kendo gouru erokamano. ¹⁶Wach Kristo mondo odagi e chunyu gi nyak duto mokelo, kupuonjoru kendo usiemoru ng'ato gi ng'ato gi rieko duto, kendo kupako Nyasaye gi wende Muma, gi wende madendo Yesu, kod wende ma Roho ochiwo, ka chunyu pako Nyasaye. ¹⁷Gimoro amora mutimo kata muwacho, to timuru e nying Ruoth Yesu, kugoyo erokamano ni Nyasaye Wuoro e nying Yesu.

Chike Momi Jo Kristo Kaka Owinjore Gidagu

¹⁸Un mon, winjuru chwou mana kaka owinjoreni Ruoth.

¹⁹Un Chwo heruru mondu, kendo kik ubed negi mager.

²⁰Nyithindo, luonuru jonyuolu e gik moko duto, nikech mano e mamiyo Ruoth mor.

²¹Wuone, kik umi nyithindu chuny lit, nono to chunysi biro jok

²²Wasumbini, luoruru ruodhiu mag pinyni e weche duto: kendo kik utim kamano mana sama gichung' butu ka ging'you kutiyo, ka gima udwaro morogi, to timuru kamano gi chuny mathuolo kendo kuluoro Ruoth. ²³Gimoro amora mutimo to timuru gi chunyu duto kagima utimo ni Ruoth to ok ni dhano, ²⁴kung'eyo ni obiro miyou mich chieng' ma nobi mondo opog ni joge girkeni kaka pokgi mokano niggi. En Ruoth Kristo ema utiyone.

²⁵Ng'euru ni ng'ato ang'ata matimo marach, noyud pokne kuom rach mosetimo, kendo onge dewo wang'nikech Nyasaye ok dew wang'ng'ato.

4 Un ruodhi mag pinyni, daguru gi wasumbini magu kuritogi maber kendo mowinjore nikech ung'eyo ni un bende un gi Ruodhu e polo.

Weche Mag Puonj Mamoko

²Timuru kinda kuom lemo, kurito gi

paro moyawore, kendo kugoyo erokamano ni Nyasaye. ³Wan bende lemnwauru mondo Nyasaye oyawnwa dhoot mar yalo Injili, kendo lando wach modhiero ji ng'eyo mar Kristo momiyi koro otweya gi nyororo. ⁴Lemnauru mondo omiya ayale e yo maler kaka owinjore atim. ⁵Daguru gi rieko e dier joma pok oyie, kutiyo gi thuolo muyudo e yo maber. ⁶Neuru ni wecheu obed mang'won man gi ndhadhu kinde duto, mondo ung'e kaka dudwoki ng'ato ang'ata wach e yo mowinjore.

Mos Mogik

⁷Tukiko biro nyisou gik moko duto matimorena. En owadwa mageno, jatich majaadiera kendo jatich Ruoth kaachiel koda. ⁸Aore iru mondo ung'e kaka wachal, kendo mondo ojiw chunyu. ⁹Obiro biro gi Onesimo owadwa majadiera ma en achiel kuomu. Gibiro nyisou weche duto matimore ka.

¹⁰Aristarko motweyago e od twech ooronu mos, kaachiel gi Mariko ma owadgi Barnaba. (Usewinjo wachne, omiyi kobiro to urwake.) ¹¹Yesu, ma nyinge machielo en Justo, bende ooronu mos. Magi kende e jo-Yahudi wetena matiyo koda ni wach Piny Ruoth Nyasaye, kendo gisehoyo chunya e yore mang'eny. ¹²Epafra maen achiel kuomu kendo misumba Kristo Yesu be omosou. Osiko olemonu matek maok oyue, mondo omi uchung' motegno, e dware Nyasaye duto kendo ka un-gi adiera chutho. ¹³Anyalo timo nende kaka otiyonu matek, un kachiel gi jo Laodikia kod jo Hieropoli. ¹⁴Osiepwa mwageno ma Luka, ma laktar, kod Dema jomosou. ¹⁵Kowuru mosna ni jowete man Laodikia, kendo ni Numfa gi kanisa man e ode.

¹⁶Ka osesomnu baruani to neuru ni osome ni kanisa mar jo Laodikia bende. To Un bende ukaw barupgi mondo usom.

¹⁷Nyisuru Arkipo kama: "Ne ni itieko tich Ruoth mane omiyi

¹⁸An Paulo, andikonu mosni gi lweta awuon. Kik wiu wil kod twechna e od twech. Ng'wono obed kodu.